

四庫全書

史部

欽定四庫全書

史部

陝西通志卷九十七

詳校官監察御史_臣劉湄

檢討_臣德生覆勘

總校官降調編修_臣倉聖脉

校對官主事_臣李 棻

謄錄監生_臣施 莘

欽定四庫全書

陝西通志卷九十七

藝文十三

五言排律
六言絕句

七言排律
七言絕句

五言絕句
詩餘

途經華嶽

唐玄宗

飭駕去京邑鳴鑾指洛川
循途經太華迴蹕暫周旋
翠岑留斜影懸崖凝夕烟
四方皆石壁五位配金天
彷彿看高掌依稀聽子先
終當銘歲月從此寄靈仙

早渡蒲關

同前

鐘鼓嚴更曙山河野望通鳴鑾下蒲坂飛旆入秦中地
險關逾壯天平鎮尚雄春來津樹合月落戍樓空馬色
分朝景雞聲逐曉風所希常道泰非復棄繻同

首夏花萼樓觀羣臣宴寧王山亭回樓下又申之

以賞樂賦詩

同前

今年通閏月入夏展春輝樓下風光晚城隅宴賞歸九
歌揚政要六舞散朝衣天喜時相合人和事不違禮中
推意厚樂處感心微別賞陽臺樂前旬暮雨飛

兄弟同遊興慶宮作

同前

代紀青門右離宮紫陌陞庭如過沛日水若度江時綺
觀連雞岫朱樓接雁池從來敦棣萼今此茂荆枝萬葉
傳餘慶千年志不移憑軒聊矚目輕輦共追隨務本方
從訓相輝保羽儀時康俗易漸德薄政難施鼓吹迎飛
蓋絃歌送羽卮所希覃率土孝弟一同規

幸鳳泉湯

同前

西狩觀周俗南山歷漢宮薦鮮知路近省斂覺年豐陰

谷含神靈湯泉養聖功益齡仙井合愈疾醴源通不重
鳴岐鳳誰矜陳寶雄願將無限澤霑沐衆心同

駕幸三會寺

上官昭容

釋子談經處軒臣刻字留故臺遺老識殘簡聖皇求駐
蹕懷千古開襟望九州四川緣塞合二水夾城流宸翰
陪瞻仰天杯接獻酬太平詞藻盛長願託鴻休

早渡分水嶺

盧照隣

丁年遊蜀道斑鬢向長安徒費周王粟空彈漢吏冠馬

蹄穿欲盡貂裘破轉寒層氷橫九折積石凌七盤重溪
既下漱峻峰亦上干隴頭聞戍鼓嶺外咽飛湍瑟瑟松
風急蒼蒼山月圓傳語後來者行路誠獨難

和許侍郎遊昆明池

李百藥

神池望不竭滄波接遠天儀星似河漢落葉類虞泉
年深平館宇道泰偃戈船差池下鳬雁掩映生雲烟浪花
開已合風文直且連稅馬金堤外橫舟石岸前羽觴傾
綠蟻飛日落紅鮮積水浮深智明珠曜雅篇大鯨方遠

擊沈灰獨未然知君嘯俦侶短翮徒聯翩

九成宮初秋應詔

劉禕之

帝囿疏金闕仙臺駐玉鑾野分鳴鳥岫路接寶雞壇林
樹千霜積神功四序寒蟬急知秋早鴛踈覺夏闌怡神
紫氣外凝眄白雲端舜海辭波發空驚遊聖難

奉和幸長安故城未央宮應制

宋之問

漢皇未息戰蕭相乃營宮壯麗一朝盡威靈千載空明
聖帳前跡置酒宴羣公寒輕綵仗外春發幔城中樂思

迴斜日歌詞繼大風今朝天子貴不假叔孫通

奉和晦日幸昆明池應制

前人

春豫靈池會滄波帳殿開舟凌石鯨度槎拂斗牛迴節
晦冀全落春遲柳暗催象溟看浴景燒劫辨沈灰鎬飲
周文樂汾歌漢武才不愁明月盡自有夜珠來

奉和幸長安故城未央宮應制

李嶠

舊宮賢相築新苑聖君來運改城隍變年深棟宇摧後
池無復水前殿久成灰莫辨祈風觀空傳承露杯宸心

千載合睿律九韶開今日聯章處猶疑上栢臺

奉和聖製途經華嶽應制

蘇頌

朝望蓮華嶽神心就日來晴觀五千仞仙掌拓山開受
命金符叶過祥玉瑞陪霧披乘鹿見雲起馭龍回偃樹
枝封雪殘碑石冒苔聖皇惟道契文字勒巖隈

敬和崔尚書大明朝堂雨後望終南山見示之作

前人

奕奕輕車至清晨朝未央未央在霄極中路視咸陽委

曲漢京近周迴秦塞長日華動涇渭天翠合歧梁五丈
旌旗色百層粉棹光東連歸馬地南指鬪雞塲晴壑照
金肥秋雲含璧璫由余窺霸國蕭相奉興王功役隱不
見頌聲存復揚權宜珍構絕聖作寶圖昌在德期巢燧
居安法禹湯冢卿才順美多士賦成章價重三臺俊名
超百郡良焉知掖垣下陳力自迷方

興慶宮酺宴應制

張說

千齡逢啓聖萬域共來威慶接郊裡後酺承農事稀御

樓橫廣路天樂下重闌鸞鳳調歌曲虹霓動舞衣合聲
雲上聚連步月中歸物睹思無外神和道入微鎬京陪
樂飲柏臺奉文飛徒竭秋雲影何資春日暉

奉和聖製途經華嶽應制

前人

西嶽鎮皇京中峰入太清玉鑒重嶺應緹騎薄雲迎霄
日懸高掌寒空類削成軒遊會神處漢幸望仙情舊廟
青林古新碑綠字生羣臣願封岱還駕勒鴻名

扈從出長安應制

沈佺期

漢宅規模壯周都景命隆西賓讓東主法駕幸天中太
史占星應春官奏日同旌門起長樂帳殿出新豐翕習
黃山下紆徐清渭東金麾張畫月珠幘戴松風是節嚴
陰始寒郊散野蓬薄霜沾上路殘雪繞離宮賜帛矜耆
老塞旒問小童復除恩載洽望秩禮新崇臣忝承明召
多漸獻賦雄

昆明池侍宴應制

前人

武帝伐昆明穿池習五兵水同河漢在館有豫章名我

后光天德垂衣文教成黷兵非帝念勞物豈皇情春仗
過鯨沼雲旗出鳳城靈魚銜寶躍仙女廢機迎柳拂旌
門暗蘭依帳殿生還如流水曲日晚棹歌清

奉和幸新豐溫泉宮應制

武平一

秦王登碣石周后襲崑崙何必在遐遠方稱萬寓尊我
皇順時豫星駕動軒轅雄戟交馳道清茄度國門回輿
長樂觀校獵上林園行漏移三象連營總八屯旌搖鸚
鵡谷旗轉鳳凰原絕壁蒼苔古靈泉碧溜溫參差開水

殿窳窳敞巖軒豐邑模猶在驪宮迹尚存烟松銜翠幄
雪逕繞花源侍從推元草文章召虎賁深仁浹夷夏洪
造溢乾坤謬忝王枚列多漸雨露恩

奉和聖製早渡蒲津關應制

張九齡

魏武中流處軒皇問道回長堤春樹發高掌曙雲開龍
負王舟渡人占仙氣來河津會日月天仗後風雷東顧
重關盡西馳萬國陪還聞股肱郡元首詠康哉

和吏部崔尚書雨後大明朝堂望南山

前人

迢遞終南頂朝朝闔闔前竭來青綺外高在翠微先雙
鳳霧為闕羣龍儼若仙還如到元圃更是謁甘泉夜雨
塵初滅秋空月正懸詭容紛入望霽色宛成妍東極華
陰踐西彌嶠冢連奔峰出嶺外瀑布落雲邊漢帝宮將
苑商君陌與阡林華鋪近甸烟靄繞晴川既庶仁斯及
分憂政已宣山公啓事罷吉甫頌聲傳濟濟金門步洋
洋玉樹篇徒歌雖有屬清越豈同年

奉和幸三會寺應制

寺傳蒼頡造書臺

鄭悛

鳥籀遺新閣龍旂訪古臺造書臣頡往觀籍帝義來睿
覽山川匝宸心宇宙該梵音隨駐輦天步接乘杯舊苑
經寒露殘池問劫灰散花將捧日俱喜聖慈開

恩勅尚書省寮宴昆明池同用堯字

張嘉貞

靈沼初開漢神池舊浴堯昔人徒習武明代此聞韶地
脉山川勝天恩雨露饒時光牽利舸春淑覆柔條芳醞

醒千日華牋落九霄幸承歡賞重不覺醉歸遙

長安早春

張子容

開國維東井城池起北辰咸歌太平日共樂建寅春雪
盡黃山樹氷開黑水津草迎金埒馬花伴玉樓人鴻鴈
看無數鶯歌聽欲頻何當桂枝擢還及柳條新

奉和聖製早渡蒲津關

徐安貞

仙掌臨秦甸虹橋闢晉關兩都分地險一曲度河灣路
得津門要時稱古戍閑城花春正發岸柳曙堪攀後乘

猶臨水前旌欲換山長安迴望日宸御六龍還

奉和聖製於望春亭觀禊飲應制

王維

長樂青門外宜春小苑東樓開萬井上輦過百花中畫
鷁移仙仗金貂列上公清歌邀落日妙舞向春風渭水
明秦甸黃山入漢宮君王來袞襖灞澆亦朝宗

送李太守赴上洛

前人

商山包楚鄧積翠靄沈沈驛路飛泉灑關門落照深野
花開古戍行客響空林板屋春多雨山城晝欲陰丹泉

通號畧白羽抵荆岑若見西山爽應知黃綺心

降聖閣

天寶七載改朝
元閣為降聖閣

儲光義

一山盡天苑一峰開道宮
道花飛羽衛天鳥游雲空玉
殿俯元水春旗搖素風
夾門小松柏覆井新梧桐
自昔大仙下乃知元化功
神皇作桂館此意與天通

登總持寺浮屠

孟浩然

半空躋寶塔晴望盡京華
竹遶渭川遍山連上苑斜
四門開帝宅阡陌俯人家
累劫從初地為童憶聚沙
一窺

功德見彌益道心加坐覺諸天近空香送落花

過四皓墓

李白

我行至商洛幽獨訪神仙園綺復安在雲羅尚宛然荒
涼千古跡蕪沒四墳連伊昔鍊金鼎何年閉玉泉隴寒
惟有月松古漸無烟木魅風號去山精雨嘯旋紫芝高
咏罷青史舊名傳今日併如此哀哉信可憐

重經昭陵

杜甫

草昧英雄起謳歌歷數歸風塵三尺劍社稷一成衣翼

亮真文德丕承戢武威聖圖天廣大宗祀日光輝陵寢
盤空曲熊羆守翠微載載窺松柏路還見五雲飛

華清宮

皇甫冉

驪岫接新豐岩堯駕翠空鑿山開秘殿隱霧蔽仙宮絳
闕猶棲鳳雕梁尚帶虹溫泉曾浴日華館舊迎風肅穆
瞻雲輦沈深閉綺櫺東郊倚望處瑞氣靄濛濛

歸馬華山

白行簡

牧野功成後周王戰馬閑驅馳休伏阜飲斲任依山逐

日朝仍去隨風暮自還
水生疑隴阪葉落似榆關
蹀躞仙峰下騰驤渭水灣
幸逢時偃武不復鼓鞀間

春色滿皇州

裴夷直

寒銷山水地春遍帝皇州
北闕晴光動南山喜氣浮
天紅粧暖樹急綠走陰溝
思婦開香閣王孫上玉樓
氛氲直城北駘蕩曲江頭
今日靈臺下翻然却是愁

華清宮三十韻

杜牧

繡嶺明珠殿層巒下繚牆
仰窺丹檻影猶想赭袍光
昔

帝登封後中原自古強
一千年際會三萬里農桑
几席延堯舜軒墀接禹湯
雷霆馳號令星斗煥文章
釣築乘時用芝蘭在處芳
北扉閑木索南面富循良
至道思元圃平居厭未央
鈎陳裏巖谷文陛厭青蒼
歌吹千秋節樓臺八月涼
神仙遠縹緲環珮碎丁當
泉煖涵窗鏡雲嬌惹粉囊
嫩嵐滋翠葆清渭照紅妝
帖泰生靈壽歡娛歲序長
月聞仙曲調霓作舞衣裳
雨露偏金穴乾坤入醉鄉
玩兵師漢武迴手倒干將
鯨鬣掀東海胡牙揭上

陽喧呼馬嵬血零落羽林槍傾國留無路還魂怨有香
蜀峰橫慘淡秦樹遠微茫鼎重山難轉天扶業更長望
賢餘故老花萼舊池塘往事人誰問幽襟淚獨傷碧簷
斜送日殷葉半凋霜迸水傾瑤砌疎風鏤玉房塵埃羯
鼓索片段荔枝筐烏啄摧寒木蝸涎蠹畫梁孤烟知客
恨遙起泰陵傍

朱坡

前人

下杜鄉園古泉聲繞舍啼靜思長慘切薄宦與垂暎北

闕干門外南山午谷西倚川紅葉嶺連寺綠楊堤迴墅
翹霜鶴澄潭舞錦雞濤驚堆萬軸舸急轉千溪眉點萱
芽嫩風條柳幄迷岸藤捎虺尾沙渚印麕蹄火燎緗桃
塢波光碧繡畦日痕絙翠巘陂影墮晴霓蝸壁蘭班蘚
銀筵豈冠泥洞雲生片段苔徑繚高低偃蹇松公老森
嚴竹陣齊小蓮娃欲語幽笋稚相攜漢館留餘趾周臺
接故蹊蟠蛟岡隱隱斑斑雉草萋萋樹老藤紆組巖深石
啓閨侵窻紫挂茂拂面翠禽棲有計冠終挂無才筆謾

題自塵何太甚休笑觸藩羝

華清和杜舍人

張祐

五十年天子離宮舊粉牆登封時正泰御宇日初長上
位名先實中興事憲章舉戎輕甲冑餘地取河湟道帝
玄元祖儒封孔子王因緣百司署聚會一人湯渭水波
搖綠秦山草半黃馬頭開夜照鷹眼利星芒下箭朱弓
滿鳴鞭皓腕攘政思獲呂望諫祇避周昌免跡貪前逐
梟心不早防幾添鸚鵡勸頻賜荔枝嘗月鎖千門靜天

高一笛涼細音搖翠佩輕步宛霓裳禍亂根潛結昇平
意遽忘衣冠逃犬虜輦鼓動漁陽外戚心殊迫中途事
可量雪埋妃子貌刃斷祿兒腸近侍煙塵隔前蹤輦路
荒益知迷寵佞惟恨喪忠良北闕尊明主南宮遜上皇
禁清餘鳳吹池冷映龍光祝壽山猶在流年水共傷杜
鵑魂厭蜀蝴蝶夢悲莊雀卵遺雕拱蟲絲罨畫梁紫苔
侵壁潤紅樹閉門芳守吏齊鴛瓦耕民得翠璫歡康昔
時樂講武舊兵塲暮草深巖靄幽花墜徑香不堪垂白

叟行折御溝楊

商於

李商隱

商於朝雨霽歸路有秋光背塢猿收果投巖麝退香建
瓚真得勢橫戟豈能當割地張儀詐謀身綺季長清渠
州外月黃葉廟前霜今日看雲意依依入帝鄉

監試蓮花峰

劉得仁

太華萬餘重岧嵕只此峰當秋倚寥泬入望似芙蓉翠
拔千尋直青危一朵穠氣分毛女秀靈有羽人蹤倒影

侵闕路流香激廟松塵埃終不及車馬自憧憧

華嶽

薛能

簇簇復亭亭三峰卓杳冥每思窮本末應合記圖經
發地連宮觀衝天接井星河微臨巨勢秦重戴奇形
太古朝羣后中央擘巨靈隣州猶映檻幾縣恰當庭
鶴毳壇風亂龍簾洞水腥望遙通北極上徹見東溟
客翫晴難偶農祈雨必零度闕無暑氣過路得愁醒
羽客時應見霜猿夜可聽頂懸飛瀑峻崦合白雲青
混石猜良玉尋

苗得茯苓從官如側近
悉俸致巖扃

過華清宮二十二韻

溫庭筠

憶昔開元日承平事勝遊
貴妃專寵幸天子富春秋
月白霓裳殿風乾羯鼓樓
鬪雞花蔽膝騎馬玉搔頭
繡轂千門妓金鞍萬戶侯
薄雲歌雀扇輕雪犯貂裘
過客聞韶謾居人識冕旒
氣和春不覺煙暖霽難收
滌浪和瓊甃晴陽上彩旂
卷衣輕髻嬾窺鏡淡娥羞
屏掩芙蓉帳簾寨玳瑁鉤
重瞳分渭曲纖手指神州
御案迷萱草天

袍妬石榴深巖藏浴鳳鮮隰媚潛虬不料邯鄲蟲俄成
即墨牛劍鋒揮太皞旗焰拂蚩尤內嬖陪行在孤臣預
坐籌瑤簪遺翡翠霜仗駐驂駟豔笑雙飛斷香魂一哭休
早梅悲蜀道高樹隔昭丘朱閣重霄近蒼崖萬古愁至
今湯殿水嗚咽縣前流

省試臘後望春宮

林寬

皇都初渡臘鳳輦出深宮高凭樓臺望遙瞻灞漣中伏
凝霜彩白袍映日華紅柳眼方開凍鶯聲漸轉風御溝

穿斷靄驪岫照晴空時見宸遊興因觀稼穡功

華山

張喬

青蒼河一隅氣壯杏雄圖卓傑三峰出高竒四嶽無力
疑擎上界勢似壓中區衆水東西走羣山遠近趨天迴
諸宿照地聳百靈扶石壁煙霞麗龍潭雨雹麤澄凝臨
甸服險固束神都淺覺川原異深應日月殊鶴歸青靄
合仙去白雲孤濁瀑斜飛練長松倒掛枯每來洞穴下
不擬泛江湖倘有芝田種巖間寄野夫

太華山

鄭谷

峭仞聳巍巍晴嵐遠近畿孤高不可狀圖寫盡應非絕
頂神仙會半空鸞鶴歸雲臺分遠靄樹谷隱斜暉墜石
連村響狂雷發廟威氣中寒渭濶影外白樓微雲對蓮
華落泉橫露掌飛乳懸危磴滑樵徹上方稀淡泊生真
趣逍遙息世機野花明澗路春蘚滋松園遠洞時聞磬
羣僧晝掩扉他年洗塵骨香火願相依

御溝十六韻

吳融

一水終南下何年派到溝穿城初北注過苑却東流繞
岸清波溢連宮瑞氣浮去應涵鳳沼來必滲龍湫漱石
珠爭散縈堤練不收照花長樂曙泛葉建章秋影炫金
莖表光搖綺陌頭旁沾畫眉府斜入教簫樓有雨難澄
鏡無萍易擲鉤鼓宜堯女瑟蕩必蔡姬舟臯著通鳴鶴
津應接斗牛迴風還激激和月更悠悠淺憶觴堪泛深
思杖可投祇懷涇合慮不帶隴分愁自有朝宗樂曾無
潰穴憂不勞誇大漢清渭貫神州

終南山二十韻

李洞

關內平田窄東西截杳冥雨侵諸縣黑雲破九門青暫
看猶無暇長棲信有靈古苔秋漬斗積霧夜昏螢怒恐
撞天漏深疑隱地形蟠根連北岳轉影落南溟窮穴何
山出遮蠻上國寧殘陽高照蜀敗葉遠浮涇斲竹煙嵐
凍踰秋雨電腥閑房僧灌頂浴澗鶴遺翎梯滑危緣索
雲深靜唱經放泉驚鹿睡聞磬得人醒踏着神仙宅敲
開洞府扃碁殘秦士局字缺晉公銘一谷勢當午孤峰

聳起丁遠平丹鳳闕冷射五侯廳萬丈氷聲圻千尋樹
影停望中仙島動行處月輪馨壘石移靈砌研膠潑上
屏明時獻君壽不假老人星

春游南靜川

宋王禹偁

南過高車嶺川原似掌平峰巒開畫障畎畝列棋枰帝
女柔桑綠王孫野草生提壺催我醉戴勝勸人耕商嶺
堪攜屐丹河可濯纓葢園松影密鞭亂竹根犇勃勃畬
田氣磷磷水磴聲野挑誰是主山鳥不知名欲舞寧無

蝶思歌亦有鶯官閒春日永擔酒此中行

靈泉覽古

韓琦

靈館驪山下開元迹尚遺蓮川噴玉溜字缺照人碑古
殿天姿晦真工石匠奇羽衣沈舊曲錦鴈失前池不見
長生鹿猶看連理枝詞雄小杜句意盡老陳詩治亂由
斯監賢愚共一悲時君自奢儉繡嶺竟何如

依韻和延安龐龍圖柳湖

范仲淹

種柳穿湖後延安盛可游遠懷忘澤國真賞即瀛洲江

景來秦塞風情屬庾樓劉琨增坐嘯王粲斗銷憂秀發
千絲墮光搖匹練柔雙雙朔乳燕兩兩睡馴鷗折翠貼
歸客濯清招隱流宴回銀燭夜行度玉關秋勝處千塢
醉勞生萬事浮主公多雅故思去共仙舟

遊南內九龍宮

蘇舜欽

昔帝龍驤後因池大此宮簫笳疊終日旌仗展無窮繪
塑神靈集飛潛爪甲雄陰軒常隱霧暗堵亦含風巨盜
來移國天王遽避戎倉皇狩巴蜀倏忽陷河潼閣殿回

看遠塵氛久見蒙歸來故基在不與徃時同疊瓦煙間
碧新築路下紅波春蕩初月沙晚發悲鴻世變今無復
人愁杳莫終樹穿瑤甃裂碑碎玉樓空九曲皆遺石諸
王祇斷蓬興亡何足問一一夕陽中

洋州

蔡交

武定新雄閫豐寧舊輿墟地兼秦蜀美川會漢洋紆翠
壘環封嶺清流躍冶渠安知下斜音邪谷音浴別得上華胥

乾酒香村落生金富里閤晴軒迎蟠螭夜管送蟾蜍啼

鳥絃幽塢芳花繡碧墟路飛游女葢巷曳隱人裾陸會
尋穿石江遨揭聚魚繳將藤解圻耗用穀驅除雙竹溪
翁杖柔芎壩戶蔬鎮留仙壻恨巖邃佛人居照市成都
錦盈庠闕里書採茶驚雉鷗護橘趁徂俗洽庭無頌
年豐庵有儲大資州將懶藐與世賢疏統總村何有甘
酣分已餘正宜心自忤更欲位誰如未執歸田耒猶乘
集事車好於閑靜處積漸學樵漁

自磻溪往陽平憩於麻田青峰寺之下院翠麓

亭

蘇軾

不到峰前寺空來渭上村北亭聊可喜修徑豈辭捫谷
映朱欄秀山含古木尊路窮驚石斷林缺見河奔馬困
思青草僧留薦晚飧我來秋日午旱久石牀溫安得雲
如蓋能令雨瀉盆共看山下稻涼葉晚翻翻

太華

徐積

怪怪不可狀誰云仅五千直侵黃道側高傍白榆偏秀
氣還秦甸濃嵐滴渭川掌高長託日漢狹半含巔夜響

金丹杵秋香玉井蓮排虛推勁翮橫銳決浮烟隱豹文
章異孤松節操堅渴虹麓飲澗饑虎瘦吞泉磴道奇
花合杉株古蔓纏羣材皆挺特餘壤可陶甄義獸期臻
萃妖狐因墜顛二關資控扼萬里却腥羶直勢南衝斗
雄姿北闕燕波濤清大海風雨到窮邊鎮壓地常靜磨
礱天更圓他山皆俯視何為可齊肩

題輞川圖

元貢師泰

開圖縱奇觀江山鬱相繆兩垞矗峯峯重湖渺漭漭邃

宇抗䟽巔危亭俯圓流春塢辛夷發夏陌高槐稠竹館
翠陰晚萸泝紅實秋遠墅漆未割近園椒欲收驚鳥避
溪泉野鹿逐巖幽日莫川上歸涼颿蕩孤舟靄靄雲氣
合漠漠烟光浮顧思天寶初綱紀壞不修霓裳按妖拍
鼙鼓起奸謀豈無匡濟術乃為閑曠留菱歌自來徃巴
辭更倡酬遂令摹寫間意度猶可求乾坤多變態江海
生暮愁白鷗飛不去千載空悠悠

華山

明
李夢陽

有嶽雄西土三峰插渭川省方朝白帝分野障金天
逖矣威靈赫遐哉秩望虔百王開寶籙七聖演瑤編
綺殿丹青列文窗俎豆聯風雲蒸大壑日月避層巒
鸞舉天維闢熬呿地軸旋岩巒莽翕水嶺嶂列綿翻
巖掛仙人掌蘿飛玉女泉霞飛夕的皪錦繡曉相鮮
葛藟搖金壁芝苓冒紫烟石膏滲復結鍾乳滴猶懸
右壓秦闕壯南包漢鄧偏徒追散馬日緬憶祖龍年
箭括通神戶雲臺秘妙筌豈惟棲鳳侶亦以遜鴻賢
方士騎茅狗官人採

石蓮寒帷瞻窈窕拄笏悵攀緣陰井遐雷馭陽崖起電
鞭聊遊凌絕頂不為學神仙

渡涇渭

何景明

北回亂涇渭東眺極澄瀛落日兩蕩涵遙天雙帶縈波
流互明滅岸圻屢崩驚隔樹望迴合分濤揚濁清堰渠
饒上壤形勢迴西京漕挽通秦世津梁跨漢城湮沈九
州會雄壯八川名空挹入河志復含浮海情風沙滿世
路雲浪渺江程鵲去星源遠鯨翻霧島輕片帆倘可借

萬里自茲行

牛頭寺

張治道

梵宇香山下王城定水隈
仙輪隨日轉塔洞拂天開
聽法神龍謁參禪怖鴿來
慈風吹寶鐸花雨滴青臺
覺路分金界迷津渡酒杯
高僧千載去錫杖幾時迴

香積寺

王鶴

古塔依蕭寺長川抱潯河
林深青靄洽地僻白雲多
春意催花鳥幽情寄薜蘿
探奇得勝境稅駕自巖阿
郊夕

牛羊下村歸漁牧歌佛光天上轉僧影月中過問法馴
山鬼裁詩敵睡魔三千空世界到處是行窩

甲戌初冬同萬堅之餉部行邊觀紅石峽盧副帥

置酒山堂即事

錢天錫

弭蓋期荒徼彎弧跨錦韉歲時分大閱部曲領中堅馬
度駝峰外人行鴈塞邊水鳴山寂寂河亂石濺濺削壁
皆銜赤嵌空各闕妍荒城曾易馬列障可屯田入峽濤
彌怒緣谿草尚芊河山嚴北戒風景異西偏石磴臨烟

渚雲窗啟梵筵漢臣頻出塞戎騎未消煙起舞風生谷
酣歌月映川甲兵湏洗盡片石即燕然

棧道感懷

胡汝霖

長劍嗟何倚焦桐悵獨攜十年錦橋柱萬里浣花溪浪
跡違鳩鵲霜天入寶雞益門紆碧澗秦嶺折丹梯仄徑
堅冰合危橋怪石擠雲林深不測魍魎自應迷行李誰
東道空囊挾病奚庸疎虛努力薄劣走塗泥失路須存
馬抨弓忍射麋流離紛老稚凍餓輟耕犁死結鶉衣短

生餘垢面顰有心摧舊血無淚續新啼日氣千山暗風
聲萬壑淒側身思漢輔何計拯周黎目極江湖濶心懸
雨露低職司俱愒愒容好暇提提野戍曾烽燧郵亭繫
馬蹄倩人給薪水徒步劇攀躋綰綬愁多緒彈冠汗浹
題那堪筋力盡且畏簡書稽流水能相送停雲似欲催
高歌生感激佇立重酸悽安得陽春布堪投谷口棲比
鄰安服食出入混東西

登五臺山絕頂詩

李汝蘭

終南有勝跡今日始攀登福地超三界天門上九層峰
巒紛錯列樓觀儼飛騰陽谷千年樹陰崖六月冰空花
晴墮雨野火晝燃燈坐石塵心息臨流爽氣澄鄉關時
一望身世杳難憑

丙吉塚

馬元善

高爵侈崇隆裒然獨異公牛耕識相度羊牧歎童蒙此
日君臣墓當年嬰杵功悠悠瀝水汧膺膺杜陵東露草
初藏兔斜陽晚咽鴻夷封鳴退讓偃坵憶卑躬蕪沒累

繫者芳名誰與同

初夏過漢陂

王九臯

漢陂真勝地海內此奇觀
水漾烟波冷堂開空翠寒
終南橫黛色紫閣拱朱欄
隴麥輕花落池荷小葉團
潛蚪翻錦浪鮮鯉躍金盤
沽酒傾囊去題詩待墨乾
天涯逢樂處官况倚能寬

送吳門李仲木出守寧羌

本朝

吳偉業

君到南山去興元驛路長
孤城當沮口舊俗問華陽
稻

近磻溪種魚從丙穴嘗殘兵白馬戍廢塢赤亭羌鐵鎖
穿天上金牛立道傍隗囂宮尚在諸葛壘應荒往事英
雄恨新愁旅客裝七盤遮駱谷十口隔陳倉黑水分榆
柳青泥老鷓鴣不堪已女曲尚賽武都王

得雒南家信

徐徵麟

長途分鞅掌薄宦信迢遄芍藥開時別芙蓉弄色妍白
雲迷遠望黃耳怯言還獨立溪干月俄看京口船蒼頭
紅笠子黑衛碧鞍韉訊問羣兒噪郵鴻幾幅聯平安書

大意艱苦述終篇號畧王畿峙唐宮帝業綿雄關遙綴
目間道側容肩西嶽碑攢戟南山谷覆縱爭獍牛鬼踞
盤互犬牙纏有路皆穿石無峰不挿天馬瘡秦嶺上鹿
走洛河邊廳事塵封鼓城樓蘚剥磚到門呼隸出宿堞
聽烽傳孤障離羣鴈遺民縮項鯢征徭虛板屋牒訴東
蒲鞭小市常驅虎荒郊未獻豳團團昏夕霧落落數晨
烟戎俗誠多陋山村更可憐胡桃勻麥飯索葦疊寒氈
宗桶依陶穴皮毛購木棉祇聞榛莽罕覩帛幾幾獸

鉞一之甚鱗圖十不全吾稽上洛郡乃在長安偏夏后
藏書日商君卜邑年神書呈綠字地寶括丹鉛節鎮三
荆重峪關二陝連先生名紀皓刺史策褒泉勝國巖山
禁純皇靖寇祆千斤俘執馘四縣戶分編筭路詳經始
篁谿久晏然太平方未遠風物竟何懸攷古蹟埋滅詢
人語涕漣中涓搜礦後么黨揭竿前旱魃頻為虐兵戈
繼益煎赤眉同聚蟻白骨比僵鱣巢讓軍營密氏羌國
號專丁男驚配伍婦稚賀登仙烈燭悲焦鼠摩雲詫老

鷁非徒殷渭水從爾什幽燕故里豺狼卧移家孤兔眠
至今繁盜賊救此賴仙賢舍弟方朝氣居官習舊篇下
僚甄利品僻壤近廉川淳靜思龔遂威靈屈董宣飛文
銷叛壘積甲受降牋壯士歸轅幕傖夫度陌阡共迎張
爽笑莫奮李陽拳賣劍追犁犢誅茆繕耨耕居人爭入
聚逋賦請新蠲坐看花將滿何嗟草不元菜根長嚼過
罄勒好持堅庭訓原如是詢謀愈慎旃嘯猿當范鶴馴
雉狎霄鳶慚慣高山騎相宜晚稻田折腰母鬱鬱豐羽

自翩翩雲錦觀初製鹽梅試小鮮當時疑捧檄此後慶
鳴絃常念倚閭望殷勤遣僕旋

王端毅公祠

有序

魏裔介

太師端毅王公祠在三原額曰彰德載在祀典垂
二百餘年今戶部尚書諱弘祚其六世孫也追維
前烈愴然霜露載庀新材式還舊觀裔介雖未獲
駿奔祠下而顓聞盛美竊載拜稽首而系之以詩

閎閎瑯瑯盛山川華嶽標偉人欣輩出駿烈翊先朝勲

業三楊並儀型百代昭澄清金鏡湛獻納玉衡調正氣
參元化餘威格有苗洞鑒傳繪像吳楚遍歌謠賜杖恩
方渥懸車德益劭上尊宣內勅祖帳動羣僚綸綍驚看
數捩栢宣易撓潞公鶴髮秀令子鳳毛超孝廟垂裳久
康僖東軸遙名齊楊伯起度越李文饒畢命仍居洛臯
謨獨佐堯家聲山共斗經術梓同喬祠宇宸章煥裳衣
袞繡飄邦人嚴伏臘牧豎戒薪樵籩豆形逾古春秋世
不祧桑田戎馬後柏寢畫蟲凋揅栢霜中圯松杉雨半

搖文孫工學治天路坐鳴鑣共羨層城鳳重光六葉貂
持籌咨會計曳履聽蕭韶魏笏藏新筍王槐發遠條掃
除因邑宰輪奐及齋寮壯觀歌丹雘豐碑倚絳霄曾元
森在列頌白醉相邀遺澤留冠劍明馨有桂椒送尸風
謏謏薦壁露蕭蕭傳說星猶燦巫咸賦可招寄言憑軾
者佳氣正岩堯

終南春望

孫爾思

岩堯太乙前登陟俯郊坰樹接三條合花圍萬戶妍樓

臺遙聳矗冠蓋數周旋西挹金莖露東瞻玉井蓮
洑流方隱見複岫自欹偏羽色分林麓苔痕界瀑泉
翠微輕若畫白閣迴如烟屐發看山興樽同結社禪
逶迤臨淨土幽勝得諸天馴鹿尋谿卧歸樵逐徑穿
鐘鳴方寂若梵響復幽然世在羲皇上人非魏晉年
拂雲褰暮薜倚磴列清筵高咏垂金石閒情遠市鄠
留侯思辟穀莊叟欲忘筌此際探幽者應疑物外仙

卜卦臺賦得卦名

有序

張金度

臺在邠州古過澗之濱顯應院內土阜焉而已傳
是苗光義為宋藝祖卜處石虎石柱猶存門前老
樹游童野女羣炙之

觀水涇河口隨波過澗旁苔衣蒙石虎田鼓震空王寺
僻雲恒宿苔荒山益蒼老松剝未盡古栢損無傷履跡
坪前草乾興寨上霜漸看春欲入睽望日初長冰解凌
陰壑花臨眉壽堂時豐閭井舊令節黍離香旅次苗光
義師中點檢郎亭屯一以卜交泰豈尋常萃廟謀何遠

升歌樂未央當年定鼎後可似此咸陽

謁白帝祠

王又旦

探幽凌絕境謁帝陟層巔赤日巖中出清流樹杪懸文
窗陳俎豆繡棋錯風烟大勢吞商洛低峰走澗瀍天迴
星作井帝用石為蓮成物功居允司方位近乾吾生悲
獲落弱質仰陶甄荷蓀生涯細攤書歲月遷一燈愁卧
閣五牖守空筌秉屨臨無地排雲欲問天威雲紛窈窕
風雨莽回旋徙倚山庭下蒼茫夜未眠

遊太湖洞

唐孫思邈先生
舊隱在耀州

許孫荃

古洞春雲靄空山
遯跡深高風齊顯晦
大隱閣升沈真
氣浮霞頂方書滿
石林居然仁者街
宛彼上皇心洗藥
池仍在燒丹竈可尋
穴依琪樹迴碑峙
淥蘿陰有客身
如寄終年病苦侵
青山連故里白髮
戀華簪顧已慚疲
繭憑誰下砭鍼
神仙不可接
悵望夕陽岑

棧道詠古

呂履恒

棧閣勢隆嵒蛇盤
復鳥攏星躔井鬼
近襟帶蜀秦雄鳳

嶺雲宵上龍江天地中石門雲積黑硤岸日窺紅蘿屋
暗含雨松巖迴過風野花香莫辨山菜味堪充薄暮交
狼狽高秋滯鴈鴻峰橫疑徑絕泉響忽橋通明滅看方
眩砰洶聽若聾村扉來乳贅城市入沙蟲度索愁行旅
羸糧累僕僮王尊回叱馭阮籍泣途窮地脉銷今古天
心背始終陳倉歸鳥雀斜谷守羆熊荒戍沿唐驛殘碑
紀漢功三分舊雞肋百穴總蠶叢割據何年事風雲此
地空烟含張魯舍臺沒隗囂宮大散關猶北嘉陵水自

東子真谷口在幽意與誰同

贈華州鄭大夫

唐王建

此宮出入鳳池頭通化門前第一州
少華山雲當驛起小敷溪水入城流
空閑地內人初滿詞訟碑前草漸稠
報狀折開知足雨赦書宣過喜無囚
自來不說雙旌貴恐替長教百姓愁
公退晚涼無一事步行攜客上南樓

洋州

宋韓億

梁州隣左古洋川氣候融融別是天地僻過冬希見鴈

箐深初夏已聞蟬鄉風與蜀微相似驛路牽秦舊接連
駱谷轉山圍境內漢江奔浪繞城邊展開步障繁花地
畫出棋枰早稻田遠寺徑危攢迸筍後園池冷軟飛泉
秋深滿院芭蕉雨晚色臨軒薜荔烟南浦採蒲當凜冽
西溪踏石向暄妍夕陽道觀鳴鐘鼓夜月人家奏管絃
楊柳影中沽酒市芰荷香裏釣魚船珍禽聽久名難辨
新菓嘗餘味更全野渡潮平分淺瀨羣樓雲散露高巔
喧闐鼓吹迎神社狼藉杯盤送客筵慈竹青筠霜鬪賦

海棠堆艷火爭燃
蒼崖險峻應藏虎
碧洞陰深恐隱仙
妓女從遊持翠蓋
士流尋勝擘香箋
戚姬廟宇青蕪沒
和相詩碑綠蘚沿
三縣俗淳宜靜理
兩衙事簡可閒眠
紛華度歲他鄉外
幽趣終朝在眼前
不為近頒明詔下
及瓜情愿滿三年

鳳州

汪元量

鳳州山館有清輝
古木扶疎散陸離
紅尾錦雞鳴古埭
綠頭花鴨蕩幽池
荷聲策策秋來候
桂影團團月上時

病馬嚼芡思故櫪驚鳥繞樹宿何枝
三分割據人如夢
滿目興亡客似癡走筆成詩聊紀實
岷峩風土出蹲鴟

望渭水

北周

庾信

樹似新亭岸沙如龍尾灣猶言吟
暝浦應有落帆還

潼關口號

唐

玄宗

河曲回千里關門限二京所嗟非
恃德設險到天平

奉和聖製潼關口號應制

張說

天德平無外關門東復西不將千
里隔何用一九泥

輞川

王維

余別業在輞川山谷其遊止有孟城坳華子岡文杏館斤竹嶺鹿柴木蘭柴茱萸泝宮槐陌臨湖亭南垞歌湖柳浪樂家瀨金屑泉白石灘北垞竹里館辛夷塢漆園椒園等與裴迪閑暇各賦絕句云

新家孟城口古木餘衰柳來者復為誰空悲昔人有

孟城坳

飛鳥去不窮連山復秋色上下華子岡惆悵情何極

華子岡

文杏栽為梁香茅結為宇不知棟裏雲去作人間雨

文杏館

檀欒映空曲青翠漾漣漪暗入商山路樵人不可知

斤竹嶺

空山不見人但聞人語響返景入深林復照青苔上

鹿柴

秋山斂餘照飛雨逐前侶彩翠時分明夕嵐無處所

木蘭柴

結實紅且綠復如花更開山中儻留客置此茱萸杯

茱萸

仄徑蔭宮槐幽陰多綠苔應門但迎掃畏有山僧來

宮槐陌

輕舸迎上客悠悠湖上來當軒對尊酒四面芙蓉開

臨湖亭

輕舟南垞去北垞森難即隔浦望人家遙遙不相識

南垞

吹簫臨極浦日暮送夫君湖上一回首青山卷白雲

敬湖

分行接綺樹倒影入清漪不學御溝上春風傷別離

柳浪

颯颯秋雨中淺淺石溜瀉跳波自相濺白鷺驚復下

樂家湖

日飲金屑泉少當千餘歲翠鳳翊文螭羽節朝玉帝

金屑泉

清淺白石灘綠蒲向堪把家住水東西浣紗明月下

白石灘

北垞湖水北雜樹映朱闌逶迤南川水明滅青林端

北垞

獨坐幽篁裏彈琴復長嘯深林人不知明月來相照

竹林館

木末芙蓉花山中發紅萼澗戶寂無人紛紛開且落

辛夷塢

古人非傲吏自闕經世務偶寄一微官婆娑數株樹

漆園

挂尊迎帝子杜若贈佳人椒漿奠瑤席欲下雲中君

椒園

輞川集二十首

裴迪

結廬古城下時登古城上古城非疇昔今人自來往

孟城坊

落日松風起還家草露晞雲光侵履跡山翠拂人衣

筆子岡

迢迢文杏館躋攀日已屢南嶺與北湖相看復迴顧

文杏館

明流紆且直綠篠密復深一徑通山路行歌望舊岑

斤竹嶺

日夕見寒山便為獨往客不知深林事但有麝麋跡

鹿柴

蒼蒼落日時鳥聲亂溪水綠谿路轉深幽興何時已

木蘭柴

飄香亂椒挂布葉間檀樂雲日雖迴照森沈猶自寒

菜萸
汴

門前宮槐陌是向歌湖道秋來山雨多落葉無人掃

宮槐
陌

當軒彌滉漾孤月正裴迴谷口猿聲發風傳入戶來

臨湖
亭

孤舟信一泊南垞湖水岸落日下崦嵫清波殊淼漫

南
垞

空濶湖水廣青熒天色同艤舟一長嘯四面來清風

歌
湖

映池同一色逐吹散如絲結陰旣得地何謝陶家時

柳
浪

瀨聲喧極浦沿涉向南津汎汎鷗鳬渡時時欲近人

樂家
瀨

縈停澹不流金碧如可拾迎晨含素華獨往事朝汲

金屑
泉

跂石復臨水弄波情未極日下川上寒浮雲澹無色

白石灘

南山北垞下結宇臨歌湖每欲采樵去扁舟出菰蒲

北垞

來過竹里館日與道相親出入惟山鳥幽深無世人

竹里館

綠堤春草合王孫自留翫况有辛夷花色與芙蓉亂

辛夷塢

好閑早成性果此諧宿諾今日漆園遊還同莊叟樂

漆園

丹刺胃人衣芳香留過客幸堪調鼎用願君垂采摘

椒園

終南望餘雪

祖詠

終南陰嶺秀積雪浮雲端林表明霽色城中增暮寒

杜陵絕句

李白

南登杜陵上北望五陵間秋水明落日流光滅遠山

題三會寺倉頡造字臺

岑參

野寺荒臺晚寒天古木悲空堦有鳥跡猶似造書時

藍田溪雜詠

錢起

片霞照仙井泉底桃花紅那知幽石下不與武陵通

石井

幾轉到青山數重渡流水秦人入雲去知向桃源裏

仙洞
謠

敷水驛

權德輿

空見水名數秦樓昔事無臨風駐征騎聊復捋頰鬚

隴上行

張仲素

行到黃雲隴惟聞羌戍聲不如山下水猶得任東西

華下逢楊侍御

馬戴

巨靈掌上月玉女盆中泉柱史息車看孤雲心浩然

秦關

司空圖

形勢今雖在荒涼恨不窮虎狼秦國破狐兔漢陵空

牛頭寺

前人

終南最佳處禪誦出青霄羣木澄幽寂踈烟泛次寥

題慈恩塔

荆叔

漢國山河在秦陵草樹深暮雲千里色無處不傷心

清涼山

四首
選一

宋
范仲淹

金明阻西嶺清涼峙其東延水正中出一郡兩城雄

華山

寇準

只有天在上更無山與齊舉頭紅日近回首白雲低

長安春望感懷

前人

灞岸春波遠秦川暮雨微
凭高正愁絕烟樹更斜暉

延利渠

司馬光

枝分清淺流縱橫貫城市
還如恩在人利澤無窮既

供兵礮

在延安府城南

前人

晨暮響寒泉飛輪駛風轉
士飽氣益振輕與先零戰

華山

金王特起

三峰盤地軸一水落天神
造化無遺巧丹青總失真

商山四皓

元錢惟善

已剖巴陵橘猶歌商嶺芝避秦非避漢一出繫安危

過未央宮遺趾

明程誥

木落漢宮秋寒蟲苦悲咽君看草色丹猶染淮陰血

夢遊華山

孫一元

半空隔風雨萬壑間長松我往探三秀騎龍蓮華峰

潤德泉

王九思

泉湧出前道滔滔兆歲豐山前問古老泉上拜周公

吳嶽

前人

城西三里道門外五峰青雲氣長來往朝朝看畫屏

長安城南懷古

許宗魯

楊柳今無渚芙蓉舊有園請看蒿里地即是樂遊原

過七盤嶺

吳國倫

驅馬度層嶺馬鳴知輾軻欲舒千里足其奈七盤何

召村

在岐山縣西八里

范吉

葉落召村暮秋風野寺深甘棠千載樹蔽芾到如今

武侯琴室

范文光

掃地走司馬此意尚如生遂令一擊節輒作七弦聲

望華

本朝
白乃貞

誰以開天手豎茲一片石芙蓉秀頂門萬古插空碧

太史祠隔河望孤山

王又旦

絕巘連雲出秋風隔水多韓原中缺處山翠壓黃河

渭川懷古

許孫奎

西風殘照急渭水奔東流不見持竿叟烟深古渡頭

豐原

王士禎

豐原高不極原上行人度秋晴渭川望遙見藍田樹

六言詩

三首
選一

漢
孔融

郭李分爭為非遷都長安思歸瞻望關東可哀夢想曹公歸來

過九成宮舊址二首

宋
游師雄

今古市朝已變隋唐樓殿成空惟有山頭明月夜來猶照荒宮

不見六龍駐蹕空餘五栢陰森當日宮前流水潺湲直

到如今

過蒲城馬上二首

選一

金震仲澤

空有滿衣塵土曾無蓋世功名忽認青山影裏有人卧
月眠雲

七盤山

明張鍊

昔聞商嶺秦嶺今過六盤七盤古木啼猿裊裊荒祠夜
雪漫漫

觀巖下花柳

三首
選一

康海

水際碧山如畫原頭輕靄霏烟繡草平連漢苑繁花遠
接秦川

渡渭

前人

馬家渡口浮渭烟波一望無涯雲外小舟迴棹泥中野
老停車

藍橋道中

李本固

鬱鬱蒼松翠栢磷磷白石丹砂玉杵元霜何處洞門深
鎖烟霞

不盡青山綠水都來鳥語花香攬
藍橋幽處渾忘身在他鄉

望終南太華有懷

本朝

許孫荃

紫閣烟迷白閣千峰雲擁三峰此際風前短笛何時杖
底疎鐘

奉和聖製韋嗣立山莊應制

唐

李嶠

萬騎千官擁帝車八龍三馬訪仙家
鳳凰原上開青壁鸚鵡杯中美紫霞

上巳日被禊渭濱應制

韋嗣立

乘春被禊逐風光
扈蹕陪鑿渭渚傍
還笑當時水濱老
衰年八十待文王

前題

沈佺期

寶馬香車清渭濱
紅桃碧柳禊堂春
皇情尚憶垂竿佐
天祚一作瑞先呈捧劍人

送新安張明府歸秦中

孟浩然

試登秦嶺

一作望

秦川遙憶青門春
可憐仲月送君從

此去瓜時須及邵平田

題觀樓

岑參

荒樓荒井閉空山
關令乘雲去不還
羽蓋霓旌何處在
空餘藥臼在人間

度隴思家

前人

西向輪臺萬里餘
也知鄉信日應疎
隴山鸚鵡能言語
為報家人數寄書

過驪山

竇羣

翠輦紅旗去不回
蒼蒼宮樹鎖青苔
有人說得當時事
曾見長生玉殿開

曲江春望

盧綸

菖蒲翻葉柳交枝
暗上蓮舟鳥不知
更上荷花最深處
玉樓金殿影參差

華清宮

前人

水氣朦朧暖畫梁
一回開殿滿山香
宮娃幾許輕歌舞
白首翻令憶建章

雪二首

司空曙

樂遊春苑望鸞毛
宮殿如星樹似毫
漫漫一川橫渭水
太陽初出五陵高

題嘉陵驛

武元衡

悠悠風旆繞山川
山驛空濛雨似烟
路半嘉陵頭已白
蜀門西上更青天

石甕寺

在驪山

權德輿

石甕靈泉勝寶井
汲人迴挂青絲綆
厨烟半逐白雲飛

當畫老僧來灌頂

遊太平公主山莊

韓愈

公主當年欲占春
故將臺榭壓城闌
欲知前面花多少
直到南山不屬人

次潼關先寄張十二閣老使君

張賁

前人

荆山已去華山來
日出潼關四扇開
刺史莫辭迎候遠
相公親破蔡州迴

漢苑竹

王涯

二月春風遍柳條
九天仙樂奏雲韶
蓬萊殿後花如錦
紫閣堦前雪未消

題秦嶺

歐陽詹

南下斯須隔帝鄉
北行一步掩南方
悠悠烟景兩邊意
蜀客秦人各斷腸

自南山却赴京師
石臼嶺頭即事寄嚴僕射

前人

鳥企蛇蟠地半天
下窺千仞到浮烟
因高回望沾恩處

認得梁州落日邊

華清宮

張籍

溫泉流入漢離宮
宮樹行行浴殿空
武帝舊時人欲盡
青山空閉御牆中

馬嵬

賈島

長川幾處樹青青
孤驛危樓對翠屏
一自上皇惆悵後
至今來往馬蹄腥

白侍郎洞

在鎮安

前人

一山未盡一山迎
百里都無半里平
宜是老僧遙指處
只堪圖畫不堪行

奉誠園

馬司徒
舊宅

元稹

蕭相深誠奉至尊
舊居求作奉誠園
秋來古巷無人掃
樹滿空牆閉戟門

長樂坡送人賦得愁字

白居易

行人南北分征路
流水東西接御溝
終日坡前恨離別
謾名長樂是長愁

羅敷水

前人

野店東頭花落處一條流水號羅敷
芳魂艷骨知何處
春草茫茫墓亦無

曲江池上

雍裕之

殷勤春在曲江頭全藉羣仙占勝遊
何必三山待鸞鶴
年年此地是瀛洲

責商山四皓

蔡京

秦末家家思逐鹿商山四皓獨忘機
如何鬚髮霜相似

更出深山定是非

再宿武關

李涉

遠別秦城萬里遊
亂山高下出商州
關門不鎖寒溪水
一夜潺湲送客愁

出藍田關寄董使君

陸暢

萬里烟蘿錦帳間
雲迎水送度藍關
七盤九折難行處
盡是龔黃界外仙

過華清宮

三首
選一

杜牧

長安回望繡成堆，山頂千門次第開。
一騎紅塵妃子笑，無人知是荔枝來。

晚秋潼關西門作

張祜

日落寒郊煙物清，古槐陰黑少人行。
關門西去華山色，秦地東來河水聲。

渭城曲

王維

渭城朝雨浥輕塵，客舍青青柳色新。
勸君更進一杯酒，西出陽關無故人。

華清宮

四首
選一

前人

紅樹蕭蕭閣半開
上皇曾幸此宮來
至今風俗驪山下
村笛猶吹阿濫堆

阿鵲湯

前人

日照宮城紅樹芳
綠窗燈影在彫梁
金輿未到長生殿
妃子偷尋阿鵲湯

華山王母祠

李商隱

蓮華峰下鎖彫梁
此去瑤池地共長
好為麻姑到東海

勸栽黃竹莫栽桑

咸陽

前人

咸陽宮闕鬱嵯峨六國樓臺艷綺羅自是當時天帝醉
不關秦地有山河

嘉陵江

薛逢

備問嘉陵江水湄百川東去爾西之但教清淺源流在
天路朝宗會有期

冷日過驪山

趙嘏

冷日微烟渭水愁翠華宮樹不勝秋霓裳一曲千門鎖
白盡梨園弟子頭

馬嵬坡

鄭畋

肅宗回馬楊妃死雲雨雖亡日月新終是聖明天子事
景陽宮井又何人

駱谷曉望

韓琮

秦川如畫柳如絲去國還家一望時公子王孫莫來好
嶺花多是斷腸枝

華清宮

三首
選一

崔櫓

門橫金鎖悄無人
落日秋聲渭水濱
紅日下山寒寂寂
濕雲如夢雨如塵

退朝望終南

李拯

紫宸朝罷綴鷄鸞
丹鳳樓前駐馬看
惟有終南山色在
晴明依舊滿長安

紫閣峰

邵謁

壯國山河倚空碧
迴拔煙霞侵太白
綠崖下視千萬尋

青天只據百餘尺

湯泉

陸龜蒙

暖殿流湯數十間
玉渠香細浪回環
上皇初解雲衣浴
珠掣時敲琴瑟山

青門

胡曾

漢皇提劍滅咸秦
亡國諸侯盡是臣
惟有東陵守高節
青門甘作種瓜人

溫泉

羅鄴

卷九十七
一條春水漱莓苔幾繞元宗浴殿回此水貴妃曾照影
不堪流入舊宮來

焚書坑

羅隱

千載遺踪一窖塵路旁耕者亦傷神祖龍筭事渾垂角
將謂詩書活得人

仙掌

前人

掌前流水駐無塵掌下軒車日日新謾向山頭高舉手
何曾招得路行人

曲江春望

唐彥謙

杏艷桃光奪晚霞
樂遊無廟有年華
漢朝冠蓋皆陵墓
十里宜春漢苑花

驪山

李洞

春日遲遲春草綠
野棠開盡飄香玉
繡嶺宮前鶴髮翁
猶唱開元太平曲

灊上

紇干著

鳴鞭晚日禁城東
渭水晴烟灊岸風
都傍柳陰回首望

春天樓閣五雲中

無定河

陳祐

無定河邊暮笛聲
赫連臺畔旅人情
函關歸路千餘里
一夕秋風白髮生

題鄜州相思鋪

令狐楚

誰把相思號此河
塞垣車馬往來多
只因自古征人淚
灑向空川作逝波

聞种山人表謝急徵不赴

二首
選一

王禹偁

表讓皇家買酒錢

上令京兆府賜山人酒錢讓而不受

醉鄉歸去更陶然

吾君若問徵君意自有東臯種黍田

別丹水

前人

曾經爛漫濯吾纓
忍別潺湲月夜聲
便入紅塵染詩思
吟魂猶合數年清

溫泉

王素

妃子當時已塵土
華清今日盡荒涼
後人不管唐成敗
猶自嚴扃道御湯

御愛山

前人

當日蒙塵歷險難得逢蒼翠喜開顏
吾皇高拱巖廊下只愛生靈不愛山

過華山懷白雲陳先生

張詠

性愚不肯林泉住強要清流擬致君
今日星馳劍南去回頭慚愧華山雲

過青泥嶺

余靖

老杜休誇蜀道難我聞天險不同山
青泥嶺上青雲路

二十年來七往還

雲臺觀

韓琦

仙掌峰前羽客家
玉虛宮殿倚雲霞
最高頂上誰曾到
得見蓮開十丈花

戲題仙掌

前人

三峰晴曉碧相挨
仙掌分明出霧開
莫向巍峩銜高手
也曾先得桂枝來

麟州

范仲淹

宣恩來到極西州城下
羌山隔一流不見耕桑見烽火
願封丞相富人侯

眉壽堂勸農

前人

烹葵剥棗古年豐
莫管時殊俗自同
太守勸農農勉聽
從今再願詠豳風

過下馬陵

蘇舜欽

下馬陵頭草色春
我來懷古一沾巾
陵邊又有累累冢
應是當年取酒人

南岐州

邵雍

鳳州十二大峰崇峙立嵯峨
我宇宙中不與巫山高下論
敢同四嶽列郡雄

再登大像閣

富弼

萬古泥陽舊帝畿
苦教行客淚沾衣
舊遊水石應牢落
盡餘花猶未歸

雲際山

程顥

南藥東邊白閣西
登臨身共白雲齊
上方頂上朝來望

陡覺羣峰四面低

天漢臺

和文與可洋州園池三十首選一

蘇軾

漾水東流舊見經
銀河左界上通靈
此臺試向天文覓
閣道中間第幾星

聞种諤米脂川大捷

前人

聞說將軍取乞銀
將軍旗鼓捷如神
應知無定河邊柳
得共中原雪絮春

中梁山寺

徐積

上方梯磴繞巖頭誰說孤高更起樓直望漢江三百里
一條如線下洋州

驪山靈泉觀

李挺

山原繚繞水縈紆繡嶺屏風列左隅更上朝元最高處
饒君都看渭川圖

朝元閣

杜常

行盡江南數十程曉風殘月入華清朝元閣上西風急
都入長楊作雨聲

過郿縣懷古二首

蔣穎叔

蜀相揚聲欲取郿關中形勢已全窺當時不是長星隕
席捲中原未可知

據險先取五丈原駐兵分關渭南田諸軍未得全無事
天下奇才始信然

過漢中

陸游

雲棧屏山日月遊馬蹄初喜踏梁州地連秦蜀川原壯
水下荆揚日夜遊

馬嵬

真山民

三郎掩面馬嵬坡生死恩深可奈何
瘞土驛旁何足恨
潼關戰處骨埋多

鳳州歌

汪元量

鳳州南去是南岐
大散橫盤勢更危
躍馬紫金河畔路
萬枝楊柳撒金絲

翠微寺

金趙秉文

南山常愛退之詩
未說雲烟潤色之
要看山光如潑黛

更須留待雨晴時

南山深鎖翠微宮寺在南山十里東祇怪朝來衫袖濕
不知身在翠微中

過楊太尉墳

前人

直道從來自不容斷碑千載尚塵封
潼關關下墳三尺清節高於太華峰

慈恩寺塔

鄴權

慈恩石塔半公卿時遇聞人為指名
龍虎榜中休着眼

一篇俚賦誤平生

過驪山

陳規

豐鎬無由問故基三章只見黍離詩而今多少華清石
都與行人刻艷詞

客有自關輔來言秦民之東徙者餘數十萬口
攜持負戴絡繹山谷間晝餐無糧糒夕休無室
廬饑羸暴露濱死無幾間有為秦聲寫去國之
思者余聞之悲不可禁乃為作商歌十章倚其

聲以紓予懷

十首
選二

折來灞水橋邊柳盡向商於道上栽
明年三月花如雪
會有好風吹汝回

行人十步九盤桓
叢壑縈迴行路難
忽到商顏最高處
一時回首望長安

驪山

二首
選一

伊喇霖

蒼苔徑滑明珠殿
落葉林荒羯鼓樓
渭水都來細如綫
若為流得許多愁

磻溪

李汾

封侯輸與曲如鉤
冷坐磻溪到白頭
老婦厨中莫彈鋏
白魚留待躍王舟

興慶夜月

喬辰

花萼樓傾有故基
行人空讀火餘碑
可憐興慶池邊月
曾伴寧王玉笛吹

四皓

元趙孟頫

白髮商顏四老翁
紫芝歌罷聽松風
半生不與人間事

亦墮留侯計街中

鳳鳴崗

仇聖耦

和鳴千古詠西周
喚起春風遍九州
一自岐陽留語後
碧梧烟冷不勝秋

楊妃墓

馬祖常

漢廟衣冠照碧燐
唐陵翁仲作黃塵
馬嵬坡上棠梨樹
猶占秦園幾日春

驪山

二首
選一

前人

玉女泉邊翠藻多石池涵影媚宮娥可憐繡嶺啼春鳥
猶似梨園弟子歌

甘泉故宮

朱德潤

漢郊五畝答鴻禧草木甘泉夜色移昨日長安道旁過
故宮無奈黍離離

天台山

九成宮
故墟

董雄飛

玉立巉巖止斷崖昔日題此作天台蟠根誰似山頭括
曾見隋唐池館來

過華山

明解縉

謫臣西來登華嶽黃河東去一秋毫
可憐閒却擎天手
萬里雲霄日月高

奉命訪張三丰到香溪祠

胡濙

枝頭小鳥語間闌野逕無人自往還
扶杖香溪臨絕壁
石橋空聽水潺潺

送韓汝慶還闕中

何景明

華嶽雲臺萬里情
高秋落日照秦城
黃河一線通滄海

身在仙人掌上行

漢中歌

前人

漢王昔日定三秦壯士東歸意氣新
旌旗暗度陳倉口父老重迎灞水濱

潼關

王廷相

天設潼關金陵城中條華嶽拱西京
何時帝劈蒼龍峽放與黃河一線行

扶風道中

十首
選二

康海

鳳城原是美陽城秦后離宮跡已平
細草不知龍輦去城邊日日喚愁生

杏林東望望隋陵覆斗巖巖隱地形
香火莫悲陵邑吏河山空倚少微星

終南篇

王九思

經臺西峙五臺東白閣陰森紫閣融
郡山羅列重雲外圭峰拱立碧天中

驪山

張原

烽火空餘百尺臺
華清宮殿已成灰
兩家失國由妃子
落日行人謾自哀

咸陽懷古

馬理

咸陽原上望秦中
渭水依然帶故宮
指鹿臂鷹人惡說
青山惟愛茹芝翁

下馬陵

前人

三尺孤墳禁苑頭
王侯至此下驂騑
兒童為問緣何事
千載真儒在此坵

關西雜詠

程誥

千年迴磴絕鳴鑾太乙祈靈有漢壇
一夜悲風銅柱折
仙人垂淚下金盤

阿房宮

胡侍

六王纔畢鮑魚回赤帝兵從軹道來
雲閣曲連三百里
野風吹作楚人灰

西巡曲

頓銳

飛輪擎水日三千咫尺長安在日邊
試向茂陵高處望

未央前殿列銅仙

答寄延綏王中丞慎微

王世貞

中丞繡斧下青霄
十萬軍聲靜不驚
何限五陵春草色
莫容戎馬向秦驕

華嶽雲臺觀

二首
選一

喬世寧

太華三峰凌紫烟
雲臺猶自隔仙壇
卧看虹飲星池水
笑指雲間玉井蓮

孟姜女祠

在同
官縣

傅振商

遙瞻絕塞暮雲間
萬死尋夫豈望還
招得遺魂從舊骸
千秋同對女迴山

前題

楊巍

列女山頭猶有廟
秦人塞上已無城
經過莫聽漆河水
猶似當年痛哭聲

太乙峰

張鍊

坐對雲山幾萬重
中間秀出玉芙蓉
四時鬱鬱浮佳氣
知是終南第一峰

蘇武節義臺

前人

蘇家門館冠當時祇剩荒臺傍水湄
欲向耕人尋往事西風吹鴈黍離離

烟霞洞鄭子貞隱處

在醴泉縣谷口

趙岫

流水柴門曲曲斜青山有洞鎖烟霞
野人不識當年事笑道隣無姓鄭家

隋公泉

在澄城

路車

蹟古隋皇可漫傷清流猶帶粉脂香
獨憐一脉甘霖水

不潤蒼生照曉妝

潼關候門

劉璽

萬古河山天府雄
秦時地利漢時功
要知鎖鑰提防處
不在晨昏啟閉中

漢陰灌臺

本朝尹任

郭外臺空徑就荒
雨餘草色自芬芳
當年假使憑棹楫
千載誰傳抱甕鄉

太史祠晚照

王又旦

雲中墮下三重嶺天上流來九折河水面紅霞搖不定
晴空一點是羲和

橋陵

許孫荃

黃帝乘龍去不還衣冠留此壑空山仙臺縹緲青霄上
古栢森森翠靄間

沙苑

前人

百里周垣抱曲堤青青豐草映回谿不知天廡今何處
惟見春風長蒺藜

長武孝子灘

張緄

千古芳名孝子灘
峰巒環繞水漫漫
行人莫向前村望
滿樹烏哺噪影寒

望見望山

二首
選一

王士禎

蒲阪南來問釣船
風陵埕上隔風烟
黃河一曲流千里
太華居然落眼前

雨宿嶽廟萬壽閣

前人

松蛻龍鱗不記年
驚人老鶴起松巔
扶筇未到希夷峽

先對三峰一夜眠

驪山懷古

八首
選三

前人

鸚鵡何年問上皇
野棠風折繚絙長
銷魂此日朝元閣
親試華清第二湯

內殿傳呼菊部頭
梨園弟子按梁州
善才零落龜年老
渭水猶明羯鼓樓

鳳凰原下鹿槽旁
號國夫人有賜莊
無數青山學眉黛
當年誰入合歡堂

馬嵬懷古二首

前人

何處長生殿裏秋無情
清渭入東流香魂不及黃旂綽
猶占驪山土一丘

巴山夜雨却歸秦
金粟堆邊草不春
一種傾城好顏色
茂陵終傍李夫人

華清宮

四首
選二

康乃心

開元天子幸溫泉
萬乘旌旗擁渭川
一自馬嵬鈴雨後
華清清夢杳如年

按歌臺上新聲歇羯鼓樓邊夕照紅
莫向行人頻問古
杏花零落舊離宮

秦莊襄墓

前人

莊襄塚並白雲齊
眎眎長安萬井低
誰指韓生傳古墓
教人錯認灞陵西

楊妃粉

吳呈祥

海棠不受鉛華染
號國猶然淡掃眉
玉骨已消泉下土
後人何事檢黃泥

昆明池

王心敬

滄池潏沆古城邊
盡道昆明鑿漢年
武帝旌旗何處是
石鯨空傍月華眠

晨過咸陽

前人

歷盡瀕河嶺幾層
秦家城闕杳無徵
徒餘纍纍北原上
不是唐陵即漢陵

憶秦娥

樂遊原

唐李白

簫聲咽秦娥夢斷
秦樓月秦樓月
年年柳色灞陵傷別

樂遊原上清秋節
咸陽古道音塵絕
音塵絕西風殘
照漢家陵闕

漁家傲

秋思

宋范仲淹

塞下秋來風景異
衡陽鴈去無留意
四面邊聲連角起
千障裏長煙落日孤城閉
濁酒一杯家萬里
燕然未勒歸無計
羌管悠悠霜滿地
人不寐將軍白髮征夫淚

華清引

蘇軾

平時十月幸蓮湯
玉甃瓊梁五家車馬如水珠璣滿路旁

翠華一去掩方牀，獨留烟樹蒼蒼。至今清夜月依舊，
過繚牆。

西河

一百四
字三疊

周美成

長安道，瀟灑西風時起。塵埃車馬晚遊行，灞陵烟水亂鴉。
棲鳥夕陽中，參差霜樹相倚。到此際，愁似葦，冷落關
河千里。追思唐漢昔繁華，斷碣殘記。未央宮闕已成灰，
終南依舊濃翠。對此景無限，愁思遠，天涯秋蟾如水。
轉使客情如醉，想當時萬古雄名盡作往來人，淒涼事。

酹江月

秋夕興元使院作
用東坡赤壁韻

胡世將

神州沈陸問誰是一范一韓人物北望長安應不見拋
却關西半壁塞馬晨嘶胡笳夕引贏得頭如雪三秦往
事只數漢家三傑試看百二山河奈君門萬里六師
不發朝議
主和聞外何人回首處鐵騎千羣都滅富平
之敗拜將
臺歌懷賢閣杳空指衝冠髮欄杆拍遍獨對中天明月

朝中措

金密璫

襄陽古道灞陵橋詩興與秋高千古風流人物一時多

少雄豪 霜清玉塞雲飛隴
首風落江臯夢到鳳凰臺
上山圍故國周遭

水龍吟

從商帥國器
獵同裕之賦

王渥

短衣匹馬清秋慣射虎南山下
西風白水石鯨鱗甲山
川圖畫千古神州一時勝事
賓僚儒雅快長堤萬弩平
岡千騎波濤卷魚龍夜
落日孤城鼓角笑歸來長圍
初罷風雲慘淡貔貅得意
旌旗閑暇萬里天河更須一
洗中原兵馬看橐鞬嗚咽咸陽道
左拜西還駕

驀山溪

張信甫

山河百二自古關中好壯歲喜功名擁征鞍雕裘繡帽
時移事改萍梗落江湖聽楚語厭蠻歌往事知多少
蒼顏白髮故里欣重到老馬省曾行也頻嘶冷烟殘照
終南山色不改舊時青長安道一回來須信一回老

望海潮

從軍舟
中作

忻元禮

地雄河嶽疆分韓晉潼關高壓秦頭山倚斷霞江吞絕
壁野烟縈帶滄洲虎旂擁貔貅看陣雲截岸霜氣橫秋

千雉嚴城五更殘角月如鉤
西風曉入貂裘恨儒冠
誤我却羨兜鍪六郡少年三朝老將賀蘭烽火新收天
外嶽連樓想斷雲橫曉誰繞歸舟剩着黃金換酒羯鼓
醉涼州

風流子

題溫泉

布薩汝弼

三郎年少客風流夢繡嶺蠶瑤環看浴酒發春海棠睡
暖笑波生媚荔子漿寒况此際曲江人不見偃月事無
端羯鼓數聲打開蜀道霓裳一曲舞破潼關馬嵬西

去路愁來無會處，但淚滿關山。
賴有紫囊泣進錦襪傳，
看歎玉笛聲沈樓頭。月下金釵信杳，
天上人間幾度秋。
風渭水落葉長安。

玉樓春

送程大尹
鵬述職

明
王九思

雪峰萬疊長安路，禁苑到時冬欲暮。
功能纔奏尚書聞，名姓早從仙桂注。
繡衣映日看丰度，玉斧飛霜來鄠杜。
門牆桃李已成陰，又見春風吹雨露。

念奴嬌

沙苑懷古

王三省

黃沙漠漠更何處在
銅鑪駟廐屋地阜
累累尋常有落
日牛羊亂牧綠柳縱橫
黑圍戰處遙想龍蛇
逐殘基斷礫倒盡周垣
遺築一望衰草連天
荒陂邊鷗鷺驚飛
還啄寒日狂風行人
迷路衫袖遮雙目
野烟淺水巨魚
肯此潛伏

江城子

登華山

本朝

張恂

朝來爽氣盡圖中
石磴窮索垂龍避
世何深樓閣挂危
峰過得青柯坪
以上奇最絕與天通
仙人掌上許誰

同石脂濃水溶溶回首紅塵千斛縱無容探取驚人詩
在否搔首問拍蒼穹

沁園春

華清
懷古

孫爾思

欲訪驪山開元遺事華清故宮歎長生殿裏獨留寒月
朝元閣上又起西風仙樂無聲龍去盡霜霰依然飛滿
空添長恨是花開桃李葉落梧桐回思唐運方隆正
曲奏霓裳猶未終乍漁陽鼙鼓一聲動地白衣紅袖各
自西東烏叫延秋鈴鳴棧道驛騎紅塵何處紅空腸斷

溫泉錦浪千古冲融

浣溪沙

春日遊黃公柳堤

前人

來往朱輪帳畫橋春雲靄靄水迢迢浪花深帶酒帘搖

青帝郊中烟一縷黃公堤上柳千條鶯兒又作殢人

嬌

洞仙歌

題香溪洞

劉應秋

壺天不遠松月長如曉發礧騰山覓瑤草見橋梁放鶴

洞府流丹歎舊時幾許遊人盡老殘棋半局爛柯無


人到誰解得茶杯火棗

相傳鄭太守訪呂仙輟
基烹茗到棗以款之

惟有孤

蓬喬木石磴溪流長在也數聲啼鳥任重門臺榭作垣

墟憑片片白雲清風自掃



陝西通志卷九十七